

Miss Verständnis 2010

Hesch Pherseenligkait und au Brofyyll e hibsches Gsichtli und nit z vyyll Spägg um s flache Byychli umme gheersch au nit grad zue de dumme? Mit Formaat kaasch Du brilliere ooni Hilf e Schwätzli fiere bisch schlangg und rangg – mit Eleganz bim Dinner oder au bim Danz so bisch pherfäggt – Dii wämmer haa mäld Dy doch no hitten aa. Denn Fraue mit vyyll Charme und Witz mit Niveau und au e bitz Flair fir d Moode und no mee wämmer uff em Lauffstääg gsee. Als Miss Schwyz muesch alles biete do nämme mer jo bstimmt kai Niete! Jä, aigedlig – so fällt mer yy sott sy doch vollkomme syy.


Doch ai Froog isch doo no offe isch das ad absurdum gloffe?

Wenn aini lächlet – nätt und brait aber waas die Daame sait do frogsch dy woo kunnt die denn häär d Antwort isch bigoscht nit schwäär! «E Kiirche» sait sy – lägg o Gruus d Fotti zaigt doch s Bundeshuus und wäär deert dinn regiere duet waiss sy halt au nit so guet.

In Zermatt het s schyynts e Bäärg dä gilted eenter nit als Zwäärg doch wien er haisst – das waiss sy nit will s halt schlicht so vyyll git. Und s Briggli deerten in Luzäärn derzue e Woppe – schyynts vo Bäärn kaa sy au nit grad binenne me kaa jo au nit alles kenne. Jä wenn sy au nit alles wisse s luegt sich nätt, bi dääne Misse. Doch wenn y doo due resymiere kaan y heggschtens spekuliere eb jetz unteer dääre Schicht am Ändi denne au e Gsicht wuurd fiire koo – wemme denn suecht oder eb me numme fluecht? E scheeni Gryte sott per see ooni Faarb scho guet uusgsee sunscht frogsch dy wäär dä Dittel hoot die wo halt am beschte moot? Schlangg syy isch scho lenger „in“ doch macht das denne wiirgglig Sinn? Lueg doch waas die aanestelle bi alle kaasch go d Rippe zelle. Jungi Maitli mache s glyych faschte sich ganz flachi Byych doch d Gränze z gsee isch eenter schwäär uffsmool wäärde d Gsichter läär und maischtens isch es denne z spoot will s denn scho um s Lääbe goot!



Duet die Waal denn no rendiere?
Wenn die Daame nit brilliere – sich d Gsichter ganz mien dabiziere – maager sinn dass d Gnoche giere so duet s das ad absurdum fiere!



Jury-Booge

Mer dien is mit so Zyyg nit gwääle – drum hitte d MissVerständnis wääle. Nit pherfäggt – doch mit Formaat – isch sy fiir das Amt baraad. Stimm jetz ab – schenier Dy nit – am beschte mached alli mit.



MissWiirtschaft

Will d Wiirtschaft bi miir so guet florient wiind uff my Syyg e Seggt serviert.



MissErabel

Erabel – waas es haisst daas waiss y nit y mach halt aifach numme mit.



MissGschigg

Bi miir ligt doch do s ganze Gschigg y find daas aifach numme digg.



MissErfolg

Erfolg ligt miir scho lang im Bluet drum waiss y wäär do gwinne duet.



MissEer

Die Waal isch miir e groossi Eer wenn y gwinn frait mii das seer.



MissGunscht

D Gunscht ligt ganz uff mynere Syte drum kemme bald scho myni Zyte.